



UPA 2015/016  
26. marts 2014  
Kalistat Lund

**Illoqarfinni nunaqarfinnilu amerlasuuni aqquserngit aserfallassimaqisut qanoq pitsanngorsarneqarsinnaanerit pillugu apeqquteqaat aallaavigalugu oqallinnissamik siunnersuut.**

(Inatsisartunut ilaasortaq, Anders Olsen, Siumut)

Oqallisissiamik saqqummiussisoq, Inatsisartunut ilaasortaq Anders Olsen ilumoorpoq, nunatsinni aqquserngit qallersorneqarnerisa aserfallassimanerat, akisussaaffiginnittuniit aqqikkuminaatsinneqartutut isikkoqaleriartormat.

Maannakkut maanni Inatsisartut oqaluttarfianniit matuminnga oqalliseqarnerput soorunami tulluarnepaasussaagaluarpoq, akisussaaffiginnippiartuniit pigaluarpat imaluunniit taakkua saaffiginninneranniit aallaaveqaraluarpat. Neriuppunga kommunalbestyrelsini qinikkat qulaatsiinnarneqartutut misigissanngitsut oqartussaaffiarneqariartuaarfimmissulli manna matuminnga oqalliseqarnerput isigissanngikkaat.

Qularinngilluinnarpara nunatsinni kommunit sisamaasut tamarmiullutik aqquserngit qanoq aserfallatsaalineqarnissaannik pilersaaruteqarsimassasut. Aamma qularinngilara pilersaarutaasimasussat akisoorujussuusimassasut kommunillu aningaasaqarnertik eqqarsaatigalugu tulleriarisarnermi qanoq periaaseqartarnerat apeqqutaasimassasooq qaqugu aqqusinernut aserfallatsaaliinissanut naammattunik aningaasaliiumaassanersut. Taasakka ilimasunnermik aallaaveqarnerugaluartut nalunngilara oqitsorsiortoqanngitsoq.

Manna oqallinnerput iluatsillugu kaammattuutigissavarput, sannartornermut ataatsimmitsitaliap eqqartugarput sammisassamissut tigussagaat, pisatsinnullu akisussaaffiginnittunut inussiarnersumik attaveqatigiinnermikkut paasisassanik immaqalu aamma periaasissanik eqqartueqatigiinnermikkut alloriarfusinnaasumik tikitaqarumaassasut.

Sannartornermut ataatsimiitsitaliap manna sammerusussaguniuk aamma qimerloorsinnaassavaat, aqqusinernut atuisut akiliutigisartagaasa qanoq ingerlaarneri taakkunangalu qanoq annertutigisoq kommunit aqqusinernut akisussaaffiginninnerinut akiliutigineqartarnerooq. Ilisimavarput kommuninut aningaasaliissutaassartut agguarnerisa iluanni sumut atorneqassanersut nalunaaqutsereerlugit tunniussisoqassaarnikuusooq, kisianni nalilersuisinnaaneq ammajuarpat tamanna pisinnaasariaqassasoraarput.

Anders Olsen oqallisissiiigavit qujanaq, pineqartup sammineqartarfissaanni suleqataassaagut.